

Na osnovu člana 46. stav 5. i člana 51. stav 3. Zakona o zaštiti prirode ("Službene novine Federacije BiH", broj 33/03), federalna ministrica okoliša i turizma donosi

PRAVILNIK

O UVJETIMA PRISTUPA ZAŠTIĆENOM PODRUČJU

Član 1.

Pravilnik definira uvjete za pristup zaštićenim područjima i obaveze vlasnika zemljišta i imanja na teritoriji zaštićenog područja.

Član 2.

Posjete i obilasci u zaštićenim prirodnim područjima moraju biti tako izvođeni da se ne remete postojeće komponente prirode i da ne budu u suprotnosti sa režimom zaštite ovih područja opisanim u Zakonu o zaštiti prirode u dijelu koji proglašava zaštićena područja (u daljnjem tekstu: propisi o upravljanju zaštićenim područjima).

Posjete i obilasci zaštićenih područja će biti omogućeni svima pod jednakim uvjetima, a prema propisima o upravljanju zaštićenim područjima.

Član 3.

Tokom posjete i obilaska zaštićenih područja, posjetioci su obavezni postupati sa prirodom i njenim sadržajem sa pažnjom i na odgovoran način. Posjetioci ne mogu sprječavati ostale građane u posjećivanju i obilasku zaštićenog područja.

Član 4.

U zaštićenom području se ne mogu obavljati aktivnosti koje izlaze izvan okvira kategorizacije date Zakonom o zaštiti prirode.

Član 5.

Pristup nukleusu zaštićenog područja se može obavljati radi zadovoljenja naučnih i edukativnih potreba, te potreba za praćenjem stanja u cilju kontinuirane zaštite i očuvanja prirodnih vrijednosti (monitoring).

Nukleus je striktno zaštićeno područje sa veoma malim humanim utjecajem, koje se koristi za monitoring prirodnih promjena u reprezentativnim ekosistemima i služi kao konzervacijsko područje za biodiverzitet.

Član 6.

Pristup nukleusu zaštićenog područja u kategoriji spomenika prirode i zaštićenog pejzaža se izvodi uz odobrenje javne ustanove za upravljanje zaštićenim područjem.

Član 7.

Pristup nukleusu zaštićenog područja u kategoriji zaštićenog prirodnog područja i nacionalnog parka se izvodi uz odobrenje Federalnog ministarstva okoliša i turizma i javne ustanove za upravljanje zaštićenim područjem.

Član 8.

Vlasnik zemljišta ili imanja, koje se nalazi na teritoriji zaštićenog područja je obavezan da dozvoli, bez naknade:

- obilježavanje (omeđivanje) zaštićenog područja na vlasnikovom zemljištu

"Službene novine FBiH" broj: 69/06

- javni pristup njegovom zemljištu za naučne, obrazovne, umjetničke i kulturne potrebe, ako nema značajnih negativnih posljedica za njegovo imanje ili njegovo bitisanje.

Posjetioci se mogu kretati na vlasnikovom zemljištu u zaštićenom području na način da ne nastane šteta ili druge negativne posljedice na vlasnikovom imanju ili njegovom bitisanju. Ako postoji mogućnost nastanka štete ili drugih negativnih posljedica od javnih pristupa vlasnikovom zemljištu, posjetioci moraju tražiti dozvolu vlasnika i slijediti njegova uputstva o ulasku na njegovo zemljište.

Član 9.

Obilježavanje zaštićenog područja treba da bude izvedeno prema posebnom planu upravljanja zaštićenog područja, bez nepotrebnih smetnji vlasniku i bez štete na njegovom imanju.

Član 10.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

Broj 04-02-1157/06
1. novembra 2006. godine
Sarajevo

Federalna ministrica
Katica Čerkez, s. r.